



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Bvrdegalen. Archiepisc.

urn:nbn:de:hbz:466:1-20006

30 Epistolarum Innocentij III.

ctoritate apostolica, remoto appellationis & contradictionis obstaculo, facultatem. Datum Laterani VIII. Kalend. Aprilis.

BYRDEGALEN. ARCHIEPISC.

*Epist. 59.
De sententia
lata pro Canonicis
Lemovicen. per Dominum
Celestinum,
& de ipsius revocatione
veritate cognita
per eundem, &
quod Dominus
Innocent. præcipit
executioni mandari quod
factum est per
Dominum Celestinum.*

Cum felix recordationis Celestinus Papa prædecessor noster bonæ memoriæ R. Petragoricensis Episcopo dederit in mandatis, ut si S. quondam Episcopus & Canonici Lemovicen. dilectum filium nostrum Guid. Marnoli Presbyterum infra viginti dies post susceptionem literarum suarum in Canonicum & fratrem nollent recipere, ipse sublato appellationis obstaculo id exequi non tardaret; eisdem Canonicis præceptum illius & commonitionem ipsius Episcopi contemnentibus, termino viginti dierum elapso, cum dictus Episcopus ad Ecclesiam Lemovicen. mandatum præfati prædecessoris nostri executurus accederet, quidam Canonici Lemovicen. cum quibusdam Clericis, & aliorum canonicorum servientibus, & laicorum multitudine juxta portas civitatis suæ, in illum & ejus socios irruentes, in quodam cœmiterio præfatum G. Presbyterum & quosdam alios in facie ipsius Episcopi nimis turpiter & inhonestè tractarunt, & duris verberibus affecerunt, & ablatiis eis equitaturis, donec longè à civitate expulerant, ingenti clamore fuerunt ipsos cum lapidibus infecuti, & P. subd. usque ad effusionem sanguinis in capite percusserunt. Episcopus verò reversus ad propria, prædictum G. Presbyterum de Lemovicen. canonica juxta mandatum apostolicum solenniter investivit; & idem prædecessor noster investituram ipsam ratam & firmam habens, auctoritate curavit apostolica confirmare. Verùm cum idem Presbyter cum literis ab eodem prædecessore nostro super investitura concessis ad propria remeasset, Aldovin. Bruschari ipsius Ecclesiæ Canonicus contra ipsum à Capitulo destinatus, adversus eum multa proponens, à præfato antecessore nostro Ecclesiam ipsam per indulgentiam sedis apostolicæ ab ipsius impetratione obtinuit prorsus absolvi. Ceterùm quoniam idem prædecessor noster postmodum multorum relatione cognovit quòd ea quæ contra præfatum Presbyterum fuerant allegata, à veritate penitus discreparant, venerabili fratri nostro Bituricensi. Ar-

chiepiscopo sub omni districtione præcepit ut non obstante indulgentia illa, vel alia, si quam in ipsius Presbyteri præjudicium impetratam esse constaret, universos Canonicos Lemovicen. Ecclesiæ publicè singulis festivis diebus nunciaret, omni dilatione, excusatione, contradictione, occasione, & appellatione postpositis, tamdiu excommunicationis, & eorum Ecclesiam interdicti sententiæ subjacere, donec præfatum Presbyterum ad canonicam Ecclesiæ suæ, de qua est auctoritate apostolica per prædictum Episcopum investitus, admitterent, & permitterent illum eam in pace tenere: alioquin illos tam excommunicatos, quàm ab officiis beneficiisque suspensos, pœnam de contemptu debitam recepturos, ad sedem apostolicam nullius contradictione vel appellatione obstante transmittere non tardaret. Illos verò, qui in sæpèdictum Presbyterum & prædicti Episcopi socios manus temerarias iniecerunt, tamdiu anathemati subjacere, & omnium officiorum ac beneficiorum, sublato appellationis diffugio, auctoritate suffultus apostolica, extorres decerneret, donec eidem Episcopo, & eorum sociis, ab illis foret de illatis injuriis plenariè satisfactum, & cum literis ipsius Archiepiscopi veritatem rei plenariè continentibus venirent ad sedem apostolicam absolvendi. Prædictus autem Archiepiscopus eos officio beneficiòque suspendit, & Ecclesiam Lemovicen. supposuit interdicto. quam sententiam ipsi Canonici servare penitus contempserunt. Nos igitur quod super hoc factum est, ratum habentes & firmum, fraternitati tuæ per apostolica scripta mandamus, & districtè præcipimus, quatenus juxta præscriptam formam ultimam transmissam Archiepiscopo memorato, sublato cujuslibet contradictionis & appellationis obstaculo, in prædicto negotio procedere non omittas; procuratori præfati Presbyteri ejus nomine sine cujuslibet interpositione personæ stallum in choro, & in Capitulo locum assignans. Nullis literis obstantibus dicto G. præfente, & respondere parato, in harum præjudicium à sede apostolica impetratis. Datum Laterani XVII. Kalend. Aprilis.